

lyktum. Öðru megin stendur orpodoxian, presta samsetningur og páfinn í Rómaborg, en hinu megin Kristur og postular hans, skynsemi og samvizka, upplýsing og menntun.

Civilisation, menntun mannkynsins er, og hefir jafnan verið, í því fólgin, að það sjer og viðurkennir og notar æ meir og meir af sannleikanum. *Sannleikurinn* í hverri grein sem er, er það eina guðs orð, sem heimurinn hefir nokkurn tíma fengið, eða mun fá. Guð hefir á öllum öldum, talað, opinberað sitt orð fyrir sína mestu og beztu syni, heimspökunga, siðabótamenn og vísendamenn. Vjer kristnir menn trúum því með góðum og gildum rökum, að Jesús Kristur hafi verið sá mesti og bezti þeirra allra, sem hingaðtil hafa lifað á jörðu og talað til vor orð guðs og sannleikans. Eg er kominn sagði hann, til að bera vitni um sannleikann, hlýðið sannleikanum, verið í sannleikanum, því „sannleikurinn mun gera yður frjálsa“. Hvílk djúp speki! Já sannarlega, sannleikurinn *frelsar* hvern einstakan mann og mannkynið frá öllu illu í þessu og öðru lífi, fyr eða síðar, og gerir manninn sælan og fullkominn. Sannleikurinn er ekki einungis guðs orð, heldur einnig guðs *vilji*, og þess vegna sigrar hann ætíð, þegar tíminn er kominn, sem enginn veit, nema sá alvitri guð. Enn tíminn kemur, vafalaust, fyr eða síðar, því guð er bæði almáttugur og alvitur og hans vilji verður á himni og jörðu.